

ein Zäpflin von einem Badschwammen / das neke in demselbigen Wasser / vnd säubere das Ohr darmit / Dis thue Morgens vnd Abends / es vertreibet das sausen.

### Das zehende Capitel.

#### Von Nasenbluten / dasselbig zustillen / mancherhand.

**B**luten der Nasen / ist etwan schädlich. Wer Catharr / Schnupffen / oder ein Geschwür im Haupt hette / so ist gut / daß ihm die Nase blutet. Es ist auch ein gut zeichen / so das Blut zu heiß wirt in dem Leibe / vnd ins Haupt auffreucht / vnd füllet die Adern so sehr / daß sie sich auffthun.

Wenn das Blut kompt auß dem rechten Nasloch / so laß ihm auff derselben seiten zu der Hauptadern / auff der Hand bey dem Daumen. Rinnet es aber auff der lincken seiten / so binde jm die Veine vber dem Knie mit einem starcken Band / so setzet sich das Blut in die Veine / Darnach stoß Eyserschalen gar klein / vñ läuters durch ein Tuch / das blase ihm in die Nasen / vnd hencke ihm die Geülen in kalt Wasser / halb Essig / so vergehet es wol. Were aber die schale von jungen Hünlin / da sie auß geschlossen weren / so weren sie desto besser.

Oder / Nimb einen Eseldreck / vnd mische den mit Essig / halte es jm für die Nasen.

Desgleichen thut ein Säwdreck / die Graß hat gessen.

Welcher fast sehr blutet / vnd sichs nicht stillen wil / so zeuch ihn auß / daß in nichts trenge oder irre / von keinem dinge / so verstehet es desto ehe.

Auch ist es gut / daß man ihm den Hersfinger an derselben seiten vnd Hand binde / daß er ihm geschwelle / so verstet das Blut. Das ist / der Finger an der lincken Hand / der nechste bey dem kleinen Finger.

Auch ist gut / wenn man Täschelkraut / oder Seckelkraut / vmb seinen Hals binde / oder ihm es in die Kand thue bis es warm wirt / vnd es jm in der Speiß eingibt. Oder / wenns im Winter were / so nimb ein firne Bonen / spalt sie enswen / vnd halt sie für die Nasen. Oder ein frischen Säwdreck in einem Tüchlin halt jm für die Nase / daß er wol daran rieche / vnd den Athem an sich ziehe.

Oder / Nimb ein weich leinin Tüchlin / einer halben Ellen breit vnd lang / neke das in kaltem Wasser / hastu aber Essig / so nimm jedes gleich viel / vnd binde es vmb die Gemächt / es vergehet ihm von stundan. Ists ein Fraw / so halt das für ihr Gemächt. Hastu aber keinen essig / so binde ihr das Tuch allein in Wasser genezt / vmb den Hals / vnd wenn es warm wirt / so neke es wider. Es ist auch zu mercken / daß du ihm den Gürtel auffthuest / vnd auffrecht sehest / daß er nit für sich hanget.

Es ist auch zu mercken / daß das bluten etwan kompt in einer Sucht / oder in einer bekehrung der Sucht zur gesundheit / das ist gut / so sol man es nicht stillen / es wolte denn zu lang bluten / daß der Mensch krank würde / so sol man ihm zu hülff kommen / ob er wolt zu schwach werden. Kommet das Blut von dem Haupt / daß der Mensch einen auffzug vom Blut in das Haupt gewinnet / dasselbe erkenne darbey: Ihm ist fornen an der stirnen wehe / dem sol man lassen zu der Hauptadern. Kompt jm aber das Blut von der Lebern / so ist jm in der rechten seiten wehe / vñ sticht in / demselbigen soltu lassen auff der rechten Hand / zu der Leberadern / bey dem kleinen Finger.

Kompt aber das Blut von dem Milz / so ist ihm in der lincken seiten wehe / vñ sticht ihn / demselbigen soltu lassen auff der lincken Hand / bey dem kleinen Finger / die Milzadern / Vnd er solle sich nicht gürtten / noch kein gedreng an dem Leibe haben / vnd sol sich auch nicht warm zudecken. Er sol sich auch hüten / vor allem dem / das ihm hitz bringet / vnd still halten.

Es ist aber auch zu mercken / daß zu weilen das bluten von einem der die Pestilens hat / nicht auffhören wil / So ist fürwar das ein tödlich Zeichen.

### Das eylffte Capitel.

#### Von allen Kranckheiten der Zäne.

**I**n Ze Zäne haben auch pein vnd schmerzen / gleich wie andere Glieder / als Nagung / Löcher / Würm / vnd wacklen der Zäne / vnd Apostemen / als Geschwür an dem Zänfleisch / vñ faule feuchtigkeiten vñnd Geblüt des Zänfleisches.

#### Ein gute Arzney für Zänwehtumb.

Nimm ein Knoblauchs Haupt / schele dasselbig / vnd stoß es in einem Mörselftein / daß es safftig